

四庫全書

集部

欽定四庫全書

集部

元詩選初集卷四十三

詳校官中書臣 王 鵬

主事銜臣 徐以坤覆勘

總校官編修臣 王燕緒

校對官檢討臣 溫常綬

謄錄監生臣 李 約

欽定四庫全書

元詩選初集卷四十三

庶吉士顧嗣立編

淵穎先生吳萊

萊字立夫浦江人集賢學士直方之子延祐間
貢舉法行有司以春秋薦下第歸出游海東洲
歷蛟門峽過小白華山登盤陀石著觀日賦以
見志還寓同縣陳士貞家與龍湫五洩鄰榛篁
蒙密似不類人世日嘯咏其中暢然自得御史

行部以茂才薦署饒州路長薌書院山長未行而疾作卒年四十四門生學子金華宋濂等議曰先生經義玄深非淵而何文辭貞敏非穎而何私謚曰淵穎先生先生與黃侍講潛柳待制貫同出訪韶父之門身羸弱如不勝衣雙瞳碧色爛爛如巖下電人或以古文試之察其辭氣即知為某代某人所作一日於故人家見几上堆剡紙數十番戲為長歌頃刻而盡觀者驚以

為神所著有尚書標說春秋世變圖傳授譜古
職方錄孟子弟子列傳樂府類編楚漢正聲等
書其子士諤裒次其遺文為十二卷門人胡翰
為之序東陽胡助謂其如千兵萬馬銜枚疾馳
而不聞其聲他人恒苦其淺陋而立夫獨患其
宏博黃侍講嘗謂人曰立夫文蘄絕宏深類秦
漢間人所作皆確論也

觀孫太古周天二十八宿星君像圖

大園杳何極鼇柱屹不傾
日月光最耀衆星莽縱橫
周天二十八錯祭各有名
荒哉審厥象晃朗奪目睛
東垣青龍岬西圍白虎獐
翔飛鳥隼狀偃伏龜蛇精
紫宮自然拱銀漢無復聲
五行所經緯甘石知性情
上界足官府神人居穆清
眊眊逞幻怪顙顙振鏗轟
跳踉鬼脚捷舛舛獸面頰
裳衣牙髀襲角鬣紛披髻
豈其太白變嬉戲類狃嬰
或者熒感動威怒流攬槍
照臨多芒角躔次在縮羸
揣摩過人料綵繪匪世程
伊誰駕一氣得以導

九坑想像陵倒景觀遊撫層城虛空何宮宇蒼莽孰節
旌母寧秉筆際溘此埃風征凡夫本狹見四顧惟褰瀛
夜入冰澁呀羅刹炎微瞠鮫女買綃出狗夫銜筍爭祇
疑列宿質却混殊方氓山神對我博刻石華山涇海神
靳我畫浪卷滄海鯨天神詎可識萬古欺聲盲星占世
有職畫史吾奚評

早秋偶然作寄宋景濂四首

西風吹梧桐一葉兩葉積故書翻有塵雄劍挂在壁時

非合窮困事到即輝赫除却雙鹿行門前少人跡

故人兩三人江北久羈旅尋香古徑風步屨修廊雨尊
鱸最有味稻蟹紛難數我欲往從之蠻潮正掀舞

北山有古寺脩竹炎天涼蛟龍踞兩澗鸛鶴鳴層岡心
臺月照白鼻觀烟通香可思未到詠此招隱章

往者東入海飄然任所如大風戕波浪飛雪灑舳艫壯
志昔尚少狂遊今併無誓登盤陀石重望扶桑墟

泰山高寄陳彥正

泰山一何高高哉極青天世人欲上不可上層巖峭壁
徒攀緣望中絕頂路已斷石穴上出鐵鎖下絙歷趄相
鈎連誰歟愛奇者步步喜若癡一心不顧死隻手捩長
烟毛羣驚迴少虎豹羽族跼墮多烏鳶浩氣剛風搏結
虛空作世界蜚龍捷鬼鑿開混沌巢神仙道逢四五叟
含笑使來前黃冠皓髮傲几榻野菜素粥鋪盤筵自非
爾願力何計此留連當知仰扣曖昧雲霄有頂處得不
俯懾巖巖箐棧無窮淵嗟茲大凡夫行尸走肉真腥羶

段碧思家最可惜李紳戀俗終難鑄舉頭告神人苦乏
風馬與電鞭藤蘿束縛即絕下但見松柏櫟參數萬仞
石稜突兀橫戈鋌古來秦漢東封不到此惟問梁父并
肅然日觀峩峩恍山下蓬萊浩渺空樓船彼云鯨可射
此謂狗能牽安期羨門一往不復返文成五利受寵驟
貴祈長年仙人自有真至道何由傳逝焉龍漢延康紀去
授金璫玉珮篇

嚴陵應仲章自杭寄書至賦此答之

故舊懸懸絕閒居欲反招幽并風雪緊楚越水雲遙短
褐緇塵破長鐔寶氣銷門垣成隱逸筆積到畊樵逆旅
呼燈夕修闌徹棘朝囊書題薈藿發論獻芻蕘舌焰真
熏灼曾兵劇鍛敝乘軒南國鶴解鏃朔庭鵬幹運天垂
斗蜚騰海作潮荃蘭騷地變橘柚貢年凋色采黃金黻
音聲徵角韶潛身甘蟄蠖賦命類茗鷄筮仕龜無兆攻
經教有條秦灰完竹帛漢粕味簞瓢畫品翎毛貴鷄塲
爪距驕文章通政理道義勝官僚歲月嗟悠久湖江耐

寂寥花濃攜酒榼
枰霽賣錫簫制虎
搖金錫驅龜駕
精橋流連光景賞
描蕩別離謠世笑
烏非鵲吾憐狗
續貂呼號三肘璞
忼慨五陵鑣落落
山中桂叢叢澗底
苗依然百將畧付
與霍嫖姚

題錢舜舉張麗華侍女汲井圖

景陽宮中景陽井
手出銀盤牽素綆
鉛華不御面生光
寶帳垂綃花妒影
臨春結綺屹層空
壁月瓊枝狎客同
鴛鴦戲水池塘雨
蛺蝶尋香殿閣風
日高歡宴驕若訴

牀脚表章昏不寤吳兒白袍戰鼓死洛土青蓋降船渡
井泥無波井闌缺半點臙脂汙緋雪蕙心蘭質吹作塵
目斷寒江鎖江鐵

問五臟

我問昔生我繫胎果何神上顧下負趾五臟交錯陳胎
經已不足乳漣復不勻黔雷不我職粉飾強為人自宜
多菑害無以保命真元氣日晷敗客邪作艱屯彼何瓠
而肥言貌勇若震此何傲而瘠肢骨弱不伸嗟夫賦命

間豈不汝由因我誠不汝慊羸膏胡不均五精被我惱
訴我蒼蒼旻恍然欲我答天道汝當遵粵自汝有生躔
次逆星辰矧從汝生後戕賊逮汝身心兮本中居與汝
相主賓汝何不祇敬狂役類風輪坎離漸違行龍虎起
戰嗔一元竟不守散入萬微塵惟脾制水穀四體承華
津有載噤汝口酒漿絕沾脣司祿不上計畀汝藜藿貧
飢腸常九回苦吻添荆榛何天不汝錫服用無箱困抑
汝弗事天寢食失鼎茵天本不病汝汝實使病臻汝仍

不耐病虛躁復善顰內虧但外養衆藥聚毒芬金石草木蟲亂投劇斧殳五精恒不寧乖沴積相熏寒增熱或壯頃刻異冰薪當知汝五臟獨不與汝親何庸汝反詰鬪我似越秦吁哉一臟損五臟遽不醇齒牙漸彫羶膚肉還削皴汝徒職汝職軀殼有君臣天曾盡賦汝造化匪不仁我聞五精言鑿鑿總有倫曰人本之天辟若泥在鈞一時巧相值萬物混無垠聖愚且同羸毛介與角鱗我惟有心肝是號橫目民心肝既屬我榮衛盍綱緼

徧歷躁溼滑備嘗酸鹹辛虐汝重役汝汝得我縑磷蚯
矧尚無臟靜夜解唱呻蝴蝶亦復然翔飛媚陽春彼寧
心肝具物性各有循鏐納或吐化死生僅昏晨自今我
即安無往不寵珍忍令百歲後銷變為烟燐曲肱便莞
簞就口取腩臄五精速歸臟大宅集靈氛張毅喜奔走
熱中果如焚單豹好容顏饑虎特汝鄰二者乃天道我
將何所云作詩示同黨聊以博笑忻

黑海青歌

越山山有黑海青長拳快眼健羽翎三年籠養未得飽
萬里驍俊猶飛星黃蘆老葦日催折白鷺文鵠看磔裂
腥沾石磧久遠風髓擊寒岡散輕雪伊人脫手本凡禽
歲晚連條到上林鉗奴素賤多侯骨騎士虛豪即俠心
晉宮邸廢身欲死燕國雲銷草如砥嗟非鸞鳳高杳冥
望盡狐狸衆披靡當時奉使探遠巢兩徵馳兵聞勇麇
南土誰知此鷙猛北州驟見爭驚號天鷙薄天垂爾翼
海青雖黑打可得太平八極無不通函谷何問關西東

大食瓶

西南有大食國自波斯傳茲人最解寶厥土善陶埏素
瓶一二尺金碧燦相鮮晶瑩龍宮獻錯落鬼斧鑄栗紋
起點綴花穠蟠琬琰定州讓巧薄邛邑鬪清堅脫指滑
欲墮凝瞳冷將穿逖哉賈胡力直致蛟鰐淵常嗟古器
物頗為世所捐襍衫易冠袞盤盞改豆籩禮圖日以變
戎索豈其然在時苟適用重譯悉來前大索幸混一四
海際幅員縣度縛繩絙娑夷航革船鑿空發使節隨俗

混民編漢玉對積筭蕃蘿塞鞍韉城池信不隔服食奈
渠遷輪囷即上據鼎釜疇能肩插葩奪豔冶威酪添馨
飴當筵特見異博識無庸詮歲之或論價裹此猶吾羶
珊瑚尚可擊磧路徒飛烟彼還彼耳市我且我枯圈角
貓獨不出記取征西年

時儺

古人重儺疫時俗事禳穰歲陽欲改律興鬼寢耀鉅厲
神乃恣肆魃蜮并猖狂佞僮幸成列巫覡陳禁方虎頭

眩金目玄製炳赤裳桃弧歐菑沴豆礫斃痺剛八靈悲
震懼六合高褰張清寧信不害動靜維吾常世途頗險巇
人魃更跳梁狐鼠戴介憤變魑竊香囊煎熬到骨髓擊
剥成疔瘍乘風作國蠹抵隙為民殃自從九鼎沒誰使
百怪藏瘡寒服褫帛飢窶食閒糧蘆花散汝體橡栗饒吾
腸地膚竟卷去天萼俱彫傷神荼欲呀啖蝮木蔓不長
蒙俱強顏貌枯竹無耿光聖言謂近戲五祀徒驚惶惜
哉六典廢述此時儼章

北方巫者降神歌

天深洞房月漆黑巫女擊鼓唱歌發高梁鐵鎧懸半空
塞向墜戶跡不通酒肉滂沱靜几席箏琶朋捐淒霜風
暗中鏗然那敢觸塞外祆神喚來速隴坻水草肥馬羣
門巷光輝耀狼麤舉家側耳聽語言出無入有凌崑崙
妖狐聲音共叫嘯健鶻影勢同飛翻甌脫故王大獵處
燕支廢磧黃沙樹休屠收像接秦宮于闐請騶開漢路
古今世事一渺茫楚機越女幾災祥是邪非邪降靈場

麒麟被髮跨大荒

題袁子仁所藏巴船出峽圖

巴山一帶高崔嵬，巴江萬里從天來。
前夫疾挽後夫推，黃牛白狗遽船開。
曉風東回水西上，湍瀨堆頭伏如象。
盤旋鳥道怕張帆，汨沒龍淵驚棹槳。
世人性命重濤波，吳鹽蜀麻得利多。
怪石急流須勇退，貪夫險魄漫悲歌。
神禹醜江江更惡，五丁鑿路空巖壑。
舟船可坐尚髮危，棧閣能行終淚落。
嗟茲舉目無不然，直愁平地即山川。

至喜亭邊聊酹酒長年三老好攤錢

東夷倭人小摺疊畫扇子歌

東夷小扇來東溟粉牋摺疊類鳳翎微颺出入揮不停
素繪巧豔含光熒銀泥蚌淚移杳冥錦屏卷盡散紅青
皓月半割蟾蜍靈紫雲暗惹鮫魚腥徐市子孫附飛舲
翫然家世雜梵經文身戴弁舊儀形對馬絕景兩浮萍
殊方異物須陳廷富賈巨舶窺天星祝融噓火時所丁
島濱賣簦送清冷白龍浸皮暑欲醒玉堦涵水夜撲螢

蓬萊仙人降輜輶扶桑繭絲結綵綰祖州芝草釀綠醅
穹龜巨鼃動遭刑海神惜寶鼎雷霆鄙夫卧病臨虛局
蒲葵百柄稱使令冰漿蔗液但滿瓶石榻被髮氣自寧
新羅一念終飄零塗脩堆尾吾何銘

憶寄方子清時子清久留吳中

一別嗟何處相思撫舊蹊月明施瀨北雲起蠡巖西跋
涉舟車動過從笈篋攜鄰光因借燭道味肯吹壅好學
螢分照論交雁擇棲丘園心薜荔海國氣鯨鯢卷帙籤

翻蠹謳吟硯發鬚經筵參老易樂府錄鏡輦治法推周
稼淳風仰漢綈談玄知野馬考字守家鷄土域標羈象
天圖辨輝鐫遺文多廢墜妙契極端倪獨樹盤桓久平
蕪眺望低霜林紅玳瑁霧雨碧玻璃屏跡依狐兔銷愁
對鷺鷥塵書投梵夾美餉挈童觴櫺葉時遮峒藤梢或
冒谿龍居睨雪瀑虎路躡霞梯出入恒聯袂追隨幾杖
藜竹山香嶺嶠花島繡湖隄尚義開費始延儒振席齊
生徒脩棗脯祭品授蒞鸛錦石看還數蒼松倚却題吾

伊朝屢集渾灝夜同稽自謂萑為歟人疑穀似稊中悵
真抑鬱外物總筌蹄歲序空流邁濤波益慘悽故袍寒
擘繭雄劍滑膏鵜綠映牽帆水紅黏曳屨泥娃宮釵鈿
拾甫里筆牀齋鶴市歌喉引鱸鄉鱸手攬吳趨誇粉黛
越產購珠犀富業連橙圃菑霖潰稻畦占歸仍浩渺結
客重酸嘶彼此身如寄參商夢欲迷蓬飛甘埽軌桂落
得通閨俠眼收丹電仙襟化素霓貧期金埒騁賤許玉
階躋病矣長憂痼閒哉敢恨睽撙除須爾鐫磨刮更予

篋本欲睇王貢茲猶慕阮嵇猖狂疏奏積軟弱謝畊犁
習靜求神悟超羣畏俗擠清琴桑有鯉鉅弩蹠非鸞教
駕傳銜轡觀隅識撩杆耜芝薰受謫抱璞聞啼性命
緣窮鬼功名屬嬖奚悠悠鸞與鳳泯泯鹿將麋白谷今
安駟青霄古執珪母寧枉隱逸辛苦等黔黎

梳珠伎

梳珠聞自宮掖來長宮寶梳手中迴日光正高竿影直風力
旋空珠勢側當時想像鼻生蔥宛轉向額栽芙蓉筋頭

交筋忽神駭矛葉舞矛憂技窮昔人因戲存戒懼後人
忘戒但戲豫漢朝索撞險還愁晉世枯梓危不寤徘徊徊
奪目睛欹欹傾傾獻玉璫滑涎罷從龍堂出輝燬命與
鬼骨爭君不見王家大娘材藝絕勤政樓前戴竿折市
人謹笑便喧城驚動金吾白梃聲

方景賢宋景濂夜坐觀吳中雜詩遂及宣和博
古圖為賦此

壯歲何心老一儒東遊飽食有江鱸詩宗鶴膝蜂腰體

禮象龍頭豕腹圖三士操琴知爾達八公遺藥忍吾臞
吳中勝處多朋故話盡寒宵燎葉鑪

客夜聞琵琶彈白翎鵲

白翎鵲東海來十里五里何摧頽一飛飛上青霄際再
飛飛墮黃沙堆少年臂名鷹齊出跨駿馬放鷹一馳躍
與鵲相上下身佩木弓射必命中中疊雙蹠血芟毛天
欲雪摩雲壓草地多風衝突三邊有意氣指揮八極無
英雄白翎鵲西海去千里萬里何軒翥一飛飛上賀蘭

山再飛飛過鐵門關少年領強兵乘勝即轉戰戟頭吹
火光旗幟舞秋練手持生鐵刀空城烏雀盡死麋麋鹿
瘡痍無處避角端躑躅向人號收拾廣輪莫郡邑肅清星嶽
靜波濤白翎鵲東海西海都驅霸太常召見日月山治
定禮行功成樂作大雅清商久寂寥鷄鷄邏娑多弦索
上林花開早浮豔榆塞葉落終迴薄一聲高一聲低一
聲懾懦百虎豹一聲束縛千鯨鯢白頭漢士聞先拍青
眼胡兒聽却啼君不見康崑崙羅黑開元絕藝傾一

國若還睹我白翎辭二十四弦彈不得

小園見園丁縛花

我嗟衆草木高出陵雲端叢生或滿地品彙可不完山
園我栽蒔作此小屈蟠龍頭何其蠢鳳翼乃若干胡然
贊化育任意騁雕刻勾萌欲旁達節目終液樛縈迴挾
烟彩刻剥獻雨癡立身既不直生理寢彫殘春陽彼一
時花發黃白丹歌謳雜舞吹酒炙飲栢棣歲晚忽焉至
北風吹汝寒皮膚早竭蝕骨髓憇枯乾聖人治天下萬

國無不歡視民本如傷動植總相安刑名威雪電劔戟
血波瀾廟堂苟失策閭里轉窮殫彼哉彼園子此况僞
爾冠人生但心勦若處得體胖我方即移汝前有蒼蘚
壇世非郭橐駝何以垂鑒觀

得大人書喜聞秋末自薩布拉復回大都賦寄
宣彥高

一紙江南到屋扉高秋漠北奉宮闈金微駐驛踰唐塞
鐵勒鳴弰接漢畿繇叢行朝因贄玉蹕林望祭類游衣

明年草賦呈親去想像汾陰扈從歸

次韻柳博士五洩山紀遊二首

日曉行呼野鶴羣山溪五級洗巖氛虹霓射壁從空現
霹靂搜潭到地聞桑苧茶鐺遺凍雪僊仝藥杵落晴雲
飄然早已同仙術老我曾探嶽瀆文

一點剛風削玉蓉仙山肺腑閱重重眼穿上界成官府
舌卷西江得祖宗驚嶺鷄峯渾未到龍湫雁蕩豈多逢
年來卧病吾環堵負却詩家九節筇

方景賢回聞吳中水滂甚戲效方子清儂言

客來自吳土示我吳儂言吳儂歲苦水謂是太湖翻太湖四萬頃三江下流洩疏濬久無人淤圩與海絕東風一鼓盪暴雪如頽城屋扉蚌蛤上畦畎魚龍爭嘉種不得入種亦悲爛死民事何所成食天俱在水富豪僅藏蓄官府更急糧貧窶徒斃餒妻子易徙鄉散行向淮壩隨處拾稻粟雖然遠鄉土恐可完骨肉東吳本富盛數歲偶彫殘世非欲繭絲官曷任虎冠國家自充實財賦

有淵藪給復當我及安寧到鷄狗何人講平準何人議
河渠荒政固有典水利復有書龍蛇方未毆鴻雁尚在
澤縱令可還定何計免溝壑何時水幸退我得刈稻禾
水退泥盡出草屨更撈蝦我思告朝廷來歲不可待毋
庸水爭地便放江達海客今聽我言我欲解儂憂所爭
但一水民氣庶今瘳自從唐季來吳越無兵械至於宋
南徙淮蜀此都會大田連阡陌居第擬侯王錦衣照車
騎玉食溢酒漿居然甲東南遂以侈濟侈培克自此多

彫瘵亦以起天寧不汝恤有此水潦淫要令沃土瘠民
得生善心豈惟生培克采詩觀民風願踵太史職

題毗陵承氏家藏古錢

我觀泉志頗識錢古今錢品不一傳歷山鑄金史靡紀
泉府職幣開其前五銖半兩日以變榆莢鶩眼爭相緣
重輕子母信有制周郭肉好俱完全吾知聖人利世用
要在百貨得懋遷農夫紅女寘不易尺布斗粟儲為淵
嗟哉後王弊自此竟使匹庶握利權剪皮鑿鏹偽莫禁

執籤障鹿性稱賢國儲何當調度足民食矧是蠶鹽先
潛交鬼神欲著論臭衒富貴仍開鄜治卒銅工各鼓鞴
偏鑪盜鑄多烟燧一朝變通別改幣餘盡沈朽徒埋船
承君好古此收拾寶玩有若編埒然大貝南金特嗇厚
元圭博壁同瑛鮮漢官受一潔簠簋晉士挂百酣栝櫟
白水真人笑有識上清童子猜非仙古錢勿用幸久聚
古貨難賣空精甄時能撫摩却穢夢坐與餐濁收饒涎
世間萬物裏可盡牀脚一甕踏欲癡試看營室錄星處

卷四十三
何似揚州騎鶴年

白鼻騮

白鼻騮白鼻騮當軒迴立噴風沙名驥留良定北土蹇
驂索價猶東家青松縛柳曉安阜紅錦裁韉春映草支
遁心機愛神駿伏波骨力輕衰老去年禁馬無馬騎天
下括馬數馬皮浮湛鄉閭萬里足笑傲品秩千金羈幸
哉漢武重修政往矣劉聰真覆鏡立防戰備要馬稀藏
富民褰須馬盛向來河隴色為羣目極川原亂若雲庶

人徒行未足恤世間醇駟何由得

寄吳正傳

日晚天寒攬敝裘西南目盡灝江流養生有論空成嬾
招隱無騷却好游雁鵠吟風燈照机蛟龍躍雪劍鳴韞
平生自笑飛騰莫幸矣心猶與道謀

樓彥珍北遊京師予病不及往餞歲晚有懷并
寄彥昭後常

日晚北風起少年方遠遊徘徊上谷塞眺望黃河流崢

嶸十月冰朔色壓九州熒煌大明殿御道接龍樓時巡
向灤水臘雪擁薊丘前驅鸞鳳旗後乘貂鼠裘尚食豐
宴飫教坊樂瑩篴百官散城邑駝馬盡歸休自今帝王
都想爾觀覽周却疑書傳聞不謂秦漢優何家非許史
無客不枚鄒投輪即雨集揮袂遽雲浮東航扶桑陰西
笮崑崙陬變化指顧異芻蕘立言收文物彼洛禊土音
吾越謳私將竊祿志勇赴隨陽謀隨陽即澤雁竊祿豈梁
鷺美玉獻劔璣精金鏤菴韞出門亟裝束行路宜滯留

布韋漫老耄鄉里惟田疇功名幸一遇螻螳尚公侯學
問敢強飾黍稷待耒耨當令竹帛上直與先達侔母使
螢爝光肅然寸草秋嗟予久抱疾餞酒弗及觴念爾忽
萬里征夢或見求宣生頗俊逸鄭子復綢繆趾高有捷
步曾正無昏眸早看拜家慶共許動宸旒傳車定不礙
闕鑰便若抽杏花開如錦楊柳滿陌頭去時小兒女來
詫真驂騑

送俞觀光學正赴調京師

崑崙東南禹九州山高海闊峙以流齊秦相襲一介丘
梁魏何有真浮漚天邑當中控四陲先生去矣不可留
二十起家今白頭獨騎麒麟誦春秋我無糧食無車舟
出門笑省雙吳鉤神氣化作青金虬大江有路通淮洲
汴河急下蛟龍愁呂梁奔飢壓黃樓故墟荒草項與劉
澤蛇臺馬一戰收東連鉅野荷花稠泰山鳬繹倚魯鄒
北沂衡漳水凌浮漚沱碣石帶白溝田光荆軻尚夷猶
擲龍屠狗何煩求天門蕩蕩開長楸日暮道遠吾驂騑

誰與遇者多公侯眼中勞苦問所由南土有客非常傳
百年文獻尚汝優公車奏牘幸早投孔姬禮樂正旁搜
齊楚辨智虛前籌祖朝內藿豈異謀庾信詩賦俱雕鏤
朔風吹塵織卉裘炕牀煤炭手足柔韭蘆豆粥却滿甌
真珠滴槽酒或芻伐狐燭兔進庶羞妖歌慢舞陳瑩葆
老當益壯在此遊選曹已似執券酬皂雕一飛即掣鬣
先生去矣聽我謳悠然獨酌更馬周長安索米毋庸憂
同吳正傳詠龔巖叟小兒高馬圖

北平爰臂久不侯伏波雙鑠空持矛并州小兒十歲許
雙足捷步真驊騮金鞍玉勒絲轡絡內鬣風髮雪斷髯
郊衢一躍自矜驕血氣未完先躡蹀漢皇神武駕英雄
四極飛來八尺龍城中鬪鷄爾尚可磧外鳴劍吾無功
初陽却照長揪道白髮奚官泣枯草悠悠翠蓋與鸞旗
老矣驊騮那得知

浦陽十景

仙華巖雪

手倚晨局一渺漫山神擁出玉嶺崦光侵道者祠星室
跡破樵家斲藥壇石筍撐空穿宿暝天機織素挂餘寒
俄然喚醒西南夢怕作松州徼外看

白石湫雲

獨上南山最上頭朝躋一點便成湫巖腰動石風初起
海眼輸泉雨欲流蜥蜴含珠光照夜靈潭卷鐵黑沈秋
明當去挾騎龍叟直到扶桑第幾洲

龍峰孤塔

老眼前頭尺五天
真龍角上正攀緣
規撫白馬馱經過
想像玄鰻護塔眠
梵唄將回知磬絕
神珠欲墮見燈懸
何妨宴坐初禪界
幘蠓分飛即大千

寶掌冷泉

乍撥山亭木葉堆
老僧千歲喝巖開
天從白石雲根出
地帶青泥雪髓來
竹影自深斜映月
魚腥不到半凝苔
世間夢渴知多少
可待金莖露一杯

月泉春誦

古木叢中息世諠老生力學掩溪門危絃未絕人須聽
蠹簡多忘我欲溫白兔流光分石色蒼龍擁沫驗沙痕
從今更浚源頭水莫待投膠與救渾

潮溪夜魚

昨夜寒潮與此通荒溪尚越百川東行依柏樹林頭月
釣拂蘆花嶼畔風插竹侵沙魚尾短篝燈映草蟹碕空
太公遠矣吾將隱赤鯉何書在腹中

南江夕照

偶出官橋倚落暉詩家觸景漫紛紛彈琴在峽驚聞瀑
菴畫為溪喜得雲竹篠晚深樵弛擔莎根秋短牧歸羣
道旁更有粉榆社欲脫蓑衣藉酒醺

東嶺秋陰

幾點晴雲著樹梢寒山蒼莽類城壕鷄豚日落聲相接
鶴鶴風涼勢自高小徑殘榛分嶺脊平疇淨綠帶溪毛
朝來雨足多秋意井上無人事桔槔

深裏江源

半遶山根但一窪真源鑿破杳無涯清澄灌或於陵圃
窈窕尋猶博望槎積雨衝隄蝸自國微烟幕渚鷺專沙
欲行復坐皆雲水只屬騷人與釣家

昭靈仙跡

一掌嵯峨是玉京連峯欲向鼎湖傾高張黼座龍隨下
靜擁珠軒虎獨行白雪松扉雙立影清風藥井倒吹聲
長歌為問西王母却把荷花與送迎

劉龍子歌

劉龍子龍子出山龍母死一雙赤鯉騰來多玄龜獨戰
翻天河山頭種楓高不得楓葉落波秋正黑潛遊蟹斷
島無人飽啖蝦鬚汙作國巢湖龜眼看欲紅印都魚頭
闢為宮絕磴懸梁但一勺雲綃霧縠餘長風劉龍子龍子
為龍猶念母拈江沼海歸何所研中墨水吾乞汝昨夜
蛇醫送飛雨

五洩東源有地度可十數畝後負山前則石河
如帶幽巖深窈蓋隱居學道者可築室偶賦一

詩屬陳彥正

越中五洩古名山東源峻嶺空雲間老石峻嶒欲見骨
天河瀉破莓苔灣蛟龍縮身似蜥蜴魑魅出沒司神姦
雷公一聲忽下擊鳥跡不到猶重關青華仙真舊治所
碧落侍從登清班穴疑綵綬據一柱戶想銅獸銜雙鏤
鳳馭鸞鞭白羽瓘芝樓茵閣朱莖殷梯梁未絕或可值
洞府寢遠多愁顏嚮曾蹇衣得揭涉別擬鑿徑道茅
菅寬弘頗占十數畝夏靜粗覺非人寰澗流帶綰玉繚

繞巒翠髻擁花爛。編截斷塵埃與世隔。構成棟宇寧吾
慳。陳君尋常有道力。況此跬步臨幽潺。虛室光明白不
動。寶鑑溫養丹將還。丈夫出處我已定。馳字早寄孤飛
鵬。休拘崑崙并漲海。遇有勝處同躋攀。

樓光遠家觀宋綬景德鹵簿圖

東朝盛文物四海極豐富。粉飾郊祀間馳驅。漢唐舊奉
常夙有掌鹵簿列前後。車輪麾飛黃戟盾服錯繡。啟肱
龍虎動危衛。駕鷺造嵯峨。屹丘岳灼爚。羅星宿陳兵。吉

利隊擇馬駒駝鹿嚴須呵八神喜欲抃百獸祖宗所繼
承宇宙徧包覆上公敬執邁天子親獻酎靈光旂旗林
綽典禮樂囿威儀一以整瑣碎無不究時惟正垂拱國
幸息戰鬪玉策恐人聞帛書疑鬼授紛紜務欺阿制作
窮刻鏤老幼咸駿奔穹示總歆臭中誠廼根本外貌特
膚腠封寧重礪繩饗或貴型餽居安昧危機致治啟亂
竇文華終耗財武弱益招寇雖然喧一朝孰得燕末胃
五輅忽已沒三京杳難救惜其初討論盍不返樸陋臨

風披此圖歎息我以綬

射的山龍瑞宮問陽明洞天洞蓋是禹穴

意行得古洞忽到陽明天人傳是禹穴愧我非史遷上
摩青冥出湧作芙蓉巔下開巨石窟鬱以藤蘿纏自昔
乘四載於茲理百川岳瀆通脈絡蛟螭被拘攣真長或
可待宛委空風烟衣冠竟一窆簡札猶遺編世間後百
世龍鬼巧相挺安能洗滌盡却見鴻荒前惜哉不可及
恐此復偶然黃庭或祕景絳府尚靈仙精英倚怪木狡

擒戲神泉

闕

論鳳文鳥冑降孤鳥
筵長嘯望天末白雲

年復年

題趙大年林塘秋晚圖

老景青黃筆底收
晴鳬冷雁共汀洲
王孫畫學空花竹
不到銅駝陌上秋

寄喻國輔張宜之

手挾殘編只蠹塵
山林著我最閒身
槁梧可據瞑須熟
華黍雖亡補欲真
危坐但看燈作暈
遠望還覺劒生鱗

相思正是多風雨滄海無涯可問津

檢故度得故洪貴叔所書李鐵槍本末寄洪德

罷

天地昔未一朔南遂分疆中原久喪亂白刃皎如霜李
全本崛起手挾但鐵槍山東數十城叱作古戰場茫然
即斷指設誓如剗羊一朝與旌節正面將假王云何引
盜賊遽爾升堂隍宣其弱能立當彼驕則亡日落山海
暗羣龍血玄黃陳安偶從晉侯景徒甌梁於人欲使詐

在國須謀長大福豈無妄佳兵終不祥誰令送死處竟
以抱甲僵漢盤忽已折周鼎那能常吁茲撫舊墨我涕
徒為滂俯仰千古意悲風嘯枯桑

浦陽舊有明月泉久而不應今乃疏道其源似
頗與弦望晦朔之間相為消長者遂作是詩

大區何渾淪元氣乃潛洩忽然為山水無往不融結遙
天偶一照厚地空餘冽盈將光共生涸與魄同滅玄機
自消長至理誰圓缺發揮雖有在窺測尚未決枯查曾

幾樓斷狀遠中裂半倚嵐翠雲微通海潮雪昔人來推
求於此得表藹虛亭奚其敞靜甃獨不蓄歲年竟悠遠
沙石漸填咽寧加疏淪功肯使見聞褻恍疑合圖經環
坐到稚耄倘非蟹投碕幾類鮒處轍纖纖浮晶彩湛湛
浸寥泝舊觀方爾還真源可吾鬪爭言彼月行豈為茲
泉設蕭丘胡長寒漢井或再熱逝尋白兔宮直探神龍
穴狂歌水仙詞擊碎如意鐵

吉祥寺

一昔逢寒食行吟採物華風生敲檻竹雨濕墮船花曲
塢青龍樹長灘白鷺沙回看江上水直去到吾家

王濬南太山石室

我將呼巨鼇滄海欲掀播於茲玉鼎淪遽使金甌破兵
氛塞中原卦氣協大過誰封函谷關便掃太微座長矛
左右盤勁矢五十箇歌鳳幾能來跨驃吾得堊當其一
手麾豈止千夫和力須圻老拳事且居奇貨真儒雖有
材用武竟無佐青雲飛遐心白羽灑寶唾撫時乃紛綸

結客仍軾軻人生足窮通世故更弔賀
熒然凍霧中仰見明星大宜哉泰階平
返汝雲壑卧專門尚吾醇致幣徒爾菱
既為梁鴻逃復厄龔勝餓從知大耋嗟
肯以淫威挫杖淚且泣岐聞風猶起懦
潯河自波濤石室今堀堞寥寥紓我哀
苦語不成些

西域種羊皮書褥歌寄李仲羽

波斯谷中神夜語波斯牧羊紛衙衙
當道刺刀羊可食土城留種羊脰骨
四圍築垣聞杵聲羊子還從脰骨生

青草叢生臍未斷馬蹄踏鐵繞垣行羊子跳跟却在草
鼠王如拳不同老飫肉筵開塞饌肥裁皮褥作書林寶
南州俠客遇西人昔得手褥今無倫君不見冰蠶之錦
欲盈尺康洽年來貧不貧

次定海候濤山

悲歌忽無奈天海何渺茫放舟桃花渡回首不可量南
條山斷脈北界水畫疆居然清冷淵枕彼黃茅岡朝淦
日星黑夜淒金碧光蹲虎巖倚伏鬬雞石乖張磨礪越

湛盧盪泊吳餘皇幽波視若畝巨壑深扶桑招徠或外
域貿易叢茲鄉嗚咿燕國語顛倒龍文裳方物抽所寶
水犀警非常驅鱸作旗幟駕鼉為橋梁似予萬里眼徒
倚千尺檣稍疑性命輕終覺意氣強寄言漆園叟此去
真望洋使擬學仙子被髮窮大荒

夕泛海東尋梅岑山觀音大士洞遂登盤陀石
望日出處及東霍山回過翁浦問徐偃王舊城
八首

山月出天末水風生晚寒扁舟劃然往萬頃相渺漫星
河白搖撼島嶼青屈盤遠應壺嶠接深已雲夢吞蟠木
繫予纜扶桑纓我冠寸心役兩目少試鯨魚竿
起尋千步沙穹石塞行路怒濤所撻擊徒以頑險故卓
哉梅子真與世良不遇上書空雪衣燒藥迺烟樹玄螭
時側行鷗鶴一迴顧從之招羨門滄海晝多霧

茫茫瀛海間海岸此孤絕飛泉亂垂纓險峒森削鐵天
香固遙聞梵相俄一瞥魚龍互圍繞仙鬼驚變滅舟航

來旅游鐘磬聚禪悅笑撫小白花秋潮落如雪

長嘯山石裂我今在東溟游目出重徼褰衣窮絕陁奇
氛抱珥赤遠影摩空青想像陽谷水徘徊燭龍形晨昏
相經絡稚耄不得寧豈若柯斧爛看棋了千齡

遙觀杳無極究與東霍隣悲夫童男女去作魚鼈民紆
嶼尚餘聚蓬山寧爾神古棹苔駐跡仙枰竹祛塵短褐
徒為拂飛槎邈難親好攜支機石去躍織女津

笑揮百川流東赴無底壑青天分極邊白浪屹為郭弁

裳或時采椎髻亦不惡投珠鮫人泣淬劍龍子愕海宮
眩鱗縷商舶豐貝錯盍不呼巨鵬因風沂寥廓

老篙迴我舟沙壘晚烟起蒼茫魚鹽場寂歷鼓吹里人
民悲舊王歲月祀遺趾終捐玉几研不掠朱弓矢東西
八駿馬今古萬螻蛄此事如或然須湔會稽水

我行半天下始到東海隅水落礁石出中飛兩鵜鶘情
知懷奇產勢與險阻俱在夷豈必陋雖聖猶乘桴吮風
丹穴鳳尾雨青丘孤幸隨任公子不愧七尺軀

還舍後人來問海上事詩以答之

去家纔五旬恍若度一歲豈不道路艱周流東海滴故
人喜我返來問海何如所經何城邑相去幾里餘我言
始戒塗尚在越西鄙隨波到句章滿日和積水人云古
翁洲遙隔水中央一夜三百里猛風吹倒檣初從蛟門
入極是險與惡白浪高於山神龍冒以躍似雪復非雪倚
檣欲上看舟子禁不可使入舟中蟠尋常重性命今特
類兒戲信哉昌黎言有海無天地掀掀終達岸鹽鹵間

黃蘆人烟寄島嶼官府猶邛壚水族紛異嗜魚蟹及蠔
蟻我寧不忍餐抹蘚相吐沫荒塵棲予髮旭日照我身
似聞六國港東壓扶桑津或稱列仙居去此亦不遠蟠
木秋更花蓬萊闢真館我非不願往此險何可當尺吳
布牙爪出沒黑水洋於奇豈易得似足直一死方去徒
自驚既歸亦云喜珍重故人言勿以險為奇茲行已僥
倖慎勿疾平夷雖然此異鄉固是難久客聖出風且恬
時清海如席我猶愛其然恨不少淹留爾母為我懼遭

此千丈虬試看塵世間甚彼大瀛海衣裳日沈溺篙舫
相奔潰奔潰孰能救沈溺將奈何口吐舌不下聊為故
人歌

去歲留杭德興傅子建夢得句云龜鼉滄海賦
龍馬赤文書問以語予及其鄉人董與幾山空
歲晚恍然有懷為續此詩却寄董

觸目懷招隱興歌託遂初俗塵多汨沒天籟幾吹噓晚
景翻濛汜秋潮洩尾閭祥雲旗鳳鳥瘴雨弩鯨魚灑淚

蛟人室漂魂建木墟龜鼉滄海賦龍馬赤文書上谷空
豪舉西河久索居蠻琛遺翡翠魯價掩璫璣遠矣鳴髀
箭悠哉薄笨車影搖青薜荔光燦白芙蓉自昔攻佔畢
于今載耒鋤彈冠身有待鑄研志非虛蘇子縱橫術韓
生內外儲乾坤瞻魏闕日月夢周廬炫耀蟠雕珮踟躕
集建旗列衣騰朔漠膠棹入黃淤趙女絃鴻鵠奚兒駕
駉騷詞林應聘汝俠骨肯愁予結駟幽并窄掄交楚越
疏奇功生鼎鼐猛氣死蘆條藥物金鵝採兵鈴赤鯉漁

中條分雍豫四序出堪輿小榻琴心展長纓劍膽舒按
圖稽獬豸醺酒笑鷄鷄野展偏求蠟山中尚著練貧猶
思祿仕老不廢耕畬卓棹才終用猖狂習未除文章同
一默歲月或三餘策竹登玄圃然藜問石渠定須追樂
毅端為謝曹蜍

山中人二首

貧賤素所有豈辭辛與勤清晨腰我斧往伐西山薪高
巖屹巨壑蛇虎氣殺人衣裳既不完出入在荆榛日日

一接浙金甌恒生塵白石幾時爛青煙空滿鄰家徒四
立壁冬令方行春亦有偃佺子脩然為世珍

去經十數里霜露淒枯田蓂笠既挂壁桔槔亦倚垣相
從盡鄰曲言笑仍喧喧惟此老瓦盆酒漿稍羅前奈何
不解飲而喜鯨吸川有如善泅人觀者乃在船寸心久
已醉雙眼方醒然世俗正馳騫悲哉東西阡

柳博士自太常出提舉江西儒學來訪宿山中

二首

一掃空山鹿豕蹤車如流水馬如龍黃魔法仗知宸輦
青史勲名問景鐘宣室受釐端有召曲臺傳禮尚為容
少年作賦將投獻東北孤雲是岱宗

尚有歐曾舊典刑森然人物照青冥身從北闕攀燕桂
夢壓西江食楚萍萬里毳袍春值雪千年龍劍夜占星
此身恨不輕簪笈的的根源在一經

鞦韆行寄趙季良時留京邑

京城寒食來沽酒城北城南映楊柳人家歡笑踏鞦韆

杏板絲繩相對懸宮錦翻衣真富貴
佞軀走肉盡神仙徘徊宛轉當風立
春晚多風吹汝急鞦韆已墜蹴踘空
華鑣翠鞞擁青驄軒轅臺前日月近
無終國裏山川同遠方羈旅紛馳逐
燕趙佳人美如玉燕歌趙舞歡未足
去年芳草今年綠

寄張子長

世豈無推挽人誰有典刑稍懷南國彥
恒愧北山靈萬里麻衣敝千年竹簡青
義文先索象魯頌或歌駟杞梓

儒林挺魚龍俠窟鯉塵埃完結綠粉黛飾娉婷擺脫蘇
張弇漸摩管樂硯道途餘雪屨巖穴但雲局本擬陳三
策吁嗟守一經跡卑淪燕雀蹤遠及孫挺種菊行荒援
看松俯絕陁仙棋閒度日旅劍懶占星故里青桐巷雙
溪白鷺汀交遊多握手歲月此忘形志氣需來哲才華
壓妙齡秦坑收末燼漢柏浸奇馨正器陳籩豆專門識
鼎鉶奔騰鞭用駿袒裼割分脰卓立撐喬嶽孤流混濁
涇鵲飛持或布鯨吼扣非筵別袂逢秋怯鄰燈入夜熒

沈沈猶在野憲憲欲揚廷舜殿瞻儀鳳堯階數歷冀螭
坳文錦褥獸闥紫金釘列徽環霄漢游車發震霆紉書
官命史吹律樂求伶迅奮君須競棲遲我未寧簷風歌
警枕井雨泣羸瓶古陌垂楊柳空山老茯苓只今馳尺
楮何所問南溟

二月六日雨書都城舊事

燕南趙北吹黃塵九天宮闕生紫雲十二門開衢路直
畫輪驄馬多行客歲寒殿外柳纔青金水河邊冰尚白

雞人傳漏放曉朝文石分班押百僚南陽近親最舞蹈
京兆耆舊爭歌謠教坊供奉飾玉女鐘能鐘聲鼓能鼓
錦來西蜀被玄駝肉出大官餐猛虎初日扶桑稍照人
內筵錫燕杏花春沐犢駢牲泰時祀鸞旂翠蓋驪山巡
東風萬里飄零雨我昔所聞今不睹快然呼酒擊酒壺
茂陵徐生曾上書

姑蘇臺歌寄方養心

姑蘇臺南閭闔開姑蘇臺北鴻雁來春花秋月幾時好

步屣尋香去如埽
冤胥憤血空海潮
老溷妖妝又烟草
少年為客誰我令
千里汝猶談一經
黃龍挾舟夜有雨
白虎司劍天無星
山中昌蒲十二節
未肯落盡青頭髮
姑蘇臺上愁殺人
身在勾吳望勾越

女殺虎行

山深日落猛虎行
長風振木威鬚鬚
父樵未歸女在室
心已與虎同死生
揚睛掉尾腥滿地
狹路殘榛苦遭噬
豈非一氣同呼吸
徒以柔軀托強鷲
君不見馮婦來下

車衆中無人尚負隅又不見裴將軍出鳴鏑一時鞍馬
俱辟易丈夫英雄却不武臨事趙趙汗流雨關東賢女
不足數孝女千年傳殺虎

烈婦行

落日沈海雲壓城官軍多載婦女行大弓勁箭自山下
顏色如灰愁上馬我生不慣生馬駒存者吾子亡吾夫
母寧完身吐玉雪忍使餒肉當熊羆青楓嶺頭望回浦
血指畫巖心獨苦老螭扣地救未及芳草迷天淚零雨

卓哉一死可百年此事已過永泰前
黃沙野塞多降骨
忠義傳中收不得

秋日雜詩二首和黃明遠

明月出東山流光射窓牖
美人曼聲歌翠袖拂南斗
別離終不常歡樂詎能久
笑折青桂枝涼風吹我手
西風披白蘋楚客自枯槁
扳龍思上天勲業苦不早
遐心隨落鴻短髮等衰草
亦有芙蓉花嫣然為誰好

鄮州二首

四月一日尚絲衣知是故鄉花片飛白頭慈母倚門久
目斷天南無鴈歸

數株楊柳弄輕煙舟泊潞州河水邊牛羊散野春草短
敕勒老公方醉眠

滄州

荒亭貰酒壯心違極目東州霧雨微百里齊封滄海接
千年禹跡濁河非暗塵掉馬呈金轡衰草看羊著錦衣
猶記上元鳴鼓夜滿船燈火越歌歸

夕乘月渡荆門聞

初更渡荆門觸眼舟楫亂堤吏時一呼舉篙類魚貫野
雞悄無聲行子空扼腕綠樹煙靄沈清波月光爛分涼
短衣披習靜單幘岸畸愁本難祛美景聊此翫荒荒東
原平泯泯魯濟斷歲儉官蒯繁時康萑苻散秋槎別星
河曉夢窺日觀懸知平生奇歷覽天下半長衢紅塵腥
古調白石梁徒聚幾州鐵肯餐三斗炭人生空自憐歲
序忽已換出門更呼車春淺冰未泮

風雨渡揚子江

大江西来自巴蜀直下萬里澆吳楚我從揚子指蒜山
舊讀水經今始睹平生壯志此最奇一葉輕舟傲烟雨
怒風鼓浪屹於城滄海輸潮開水府淒迷瀟灑恍如見
潏澠扶桑杳何所須臾草樹皆動搖稍稍鼃鼃欲掀舞
黑雲鯨漲頗心掉明月貝宮終色侮吟倚金山有莫鐘
望窮采石無朝艣誰歟敲齒兇能神或有偃身言莫吐
向來尺塹如有限日夜軍書費傳羽三楚畸民類魚鼈

兩淮大將猶熊虎錦帆十里徒映空鐵鎖千尋竟然炬
桑麻夾岸收戰塵蘆葦成林出漁戶寧知造物總兒戲
且攬長川入尊俎悲哉險阻惟白波往矣英雄幾黃土
獨思萬載疏鑿功吾欲持觴酹神禹

寄柳博士

試續儒林傳南州定幾人清標騰鳳翼素手截鯨鱗卓
犖初觀國軒騰早致身燕秦爭騁俠鄒魯共稱醇旅劍
渾如淬家甌在一振於焉徵有道自此教成均學術諸

生識才名六館親
土脉然燭夜茸帳結餐晨
上下笙鏞間縱橫
俎豆陳岐原周鼓老闕里
魏碑真白日常前席
青雲仰後塵
山林稽猛駁文字到祥麟
豈獨呻佔畢猶應逐縉紳
討論抽秘典扈從得良臣
絕漠幽州暗滄波碣石鄰
鸞旗飛旖旎革路壓輪囷
御苑材官集離宮宸騎巡
赤狐翻遠譯黃鼠割時珍
法酒蒲萄熟天花芍藥春
朔風沙鷗健衝雪野駢馴
北海誰求隱東都或對賓
三閩寧設險八極總歸仁
悵望懷今古虞歌邁等倫
短

衣曾見寵長鉞每忘貧共往仍聯駟同吟更接茵玉山
森巨石金水濯芳津本擬追枚乘終然愧卻詵鹿鳴來
已再鵬擊去何因色挺淮王桂香生楚客蘋聖朝初薦
士江漢有垂綸

一笑

一笑長竿折徒憐大海魚文章猶暫覩塵土只鹽車白
日燕臺劒清風禹穴書上林誰獻賦愁絕馬相如

嶺南宜濛子解渴水歌

廣州園官進渴水天風夏熟宜濛子百花醞作甘露漿
南國烹成赤龍髓棕櫚亭高內撤餐梧桐井壓滄江乾
栢觀金莖擎未溼藍橋玉臼擣空寒小甕封出香覆錦
古鼎貢餘聲撼寢酒客心情辟酒兵茶僧手段侵茶品
阿瞞口酸那得梅茂陵肺消誰賜栢液奪胡酥有氣味
波凝海樾無塵埃向來暑殿評湯物沈木紫蘇聞第一
觀隋王度古鏡記後題

王家有古鏡軒氏昔鑄成太一來護治玄冥與儲精日

月鍾瓊瑤龜蛇助威寧萬靈吐真水全體洞泰清綵奩
出未半冰片弄光晶寶匣收不動玉鱗聞響聲有身尚
變化無翼欲飛行恍然百世後流落汾陰城高士觀即
賞胡僧識還驚金鉛拭膏澤絳碧穿屋楹牆垣照可徹
臟腑燭能縈涕泣念鸚鵡悲酸逢豹生一朝忽屏跡六
幕黯不明狐狸遞隱見魑魅莽縱橫皮膚峻刮削骨髓
窮敲榜雷風倘有作厲虐敢紛更嗟吾幸居山猿鹿與
我爭嗟吾願渡海蛟鰐恐並迎楊氏雀環在張公龍劍

并因茲訪洞穴得不振冠纓

雙林寺觀傳大士頂相舍利及耕具故物

古稠大山趨古原古寺突兀倚山根小溪前流未及渡
白塔岌起高蹲蹲傳公故宅奉香火厦屋萬間周四垣
梁朝到今數百載兜率說法天中尊世曾出世後妻子
家或漁扈隨犂犍道冠儒履忽一變胡膜梵唄爭駭弄
蕭衍老公坐玉殿捨身建剎開祇園花幡亂飛欲滿席
拍板歌唱聞槌門雲光靈異竟何有仇脊怪神寧復言

藕絲絮袋上所賜奇錦照耀扶桑暎龍宮四萬八千卷
寶藏一轉百鬼掀貝多遺文白氎像經律論疏洪其源
黃羅繡褥裹頂骨舍利五色麾尼燉一牛眠雲已化石
雙鶴覆雨仍軒騫劫風吹地日漸壞樓閣樹林無半存
青檣並聳碧宇上落葉散到人家村浮圖仁祠始自漢
文罽華蓋何翻翻梁時佞佛特太甚宗祀斷血徒饕飮
父兄子弟且學佛絕滅恩愛生讎冤臺城矗天或死守
虜騎乘興真游魂幸災樂禍却圍視入室操戈恣齧吞

蠟鵝厭埋冢難遠烏慢囚辱兵氛昏人天小果豈不有
宇宙缺醫疇能藩一朝佛出救不得滄海攪作黃河渾
傳公家居自天屬時復耕耨不憚煩朝廷聰明願不及
塔廟湧出如雲屯長干空迎佛爪髮滿國欲飽民膏腴
羣僧無功并仰食我佛獨不憂黎元惜哉後王永不寤
前後喪亂同一轅後民皈向復未已拱手禮拜駢肩跟
咒口波瀾宜祝蟒禪心寂默猶拘狴終然百欺幾一遇
使俗瑣瑣吾何論

登岸泊道隆觀觀有金人闖海時斫柱刀跡因

聽客話蓬萊山紫霞洞二首

我舟半夜發舉目流滔滔倏然風萬里誰謂水一篙幽
島不可辨亂蕉出如鼇侵晨始登岸身靜心實勞小徑
連沮洳玄扃悶蓬蒿彈塗爭走穴傑步擁朱臂怪花絡
璀璨陰木森蕭騷東都昔奔潰南海紛戰艘簷楹偶潛
伏部伍爭遁逃將施攻城火尚見斫柱刀黃屋祛曉褱
翠華濕秋濤運往龍蛻久人來鶴飛高曲巖迷丹鼎清

治燭鬚毛毋煩踞龜殼自此辭盧敖

起行海東洲重險忽已渡由來產神奇政為孤絕故幽
芳窄容搜修蟄高螯赴荒烟淒暗潮旭日照晴樹似聞
蓬萊山去此特跬步蟠根迄中立發乳森外護紫氛蒸
作霞玄浪激為霧古穴通若與靈文讀不句赤玉舄者
誰黃金闕何處常疑方士說未省仙子遇芝草空漢廷
鯨魚壓秦路彼猶莫能得今我獨何據馮夷開水宮禦
寇控風馭從渠指虛無此計恐遲莫

秋夜效梁簡文宮體二首

無奈良夜永起登樓上頭鵲翻金殿宿螢近玉階流梧桐
老葉恨芙蓉新蕊愁婕妤團扇上那得不驚秋

曾是昔年寵如今誰與同秋獵長楊苑夜幸荷蘭宮瓊
杯香泣露翠袞薄禁風將心與明月流入君帷中



元詩選初集卷四十三